

Ɔwulú Nyɔɔsɔ́ Paulo Lówanlín Sísí Korintofɔ

1 ¹Mí Paulo ání una Bulu apétɔ nabwé Kristo Yesu *sumbí ɔɔpú mva aní pío Timoteo dé ɔwulú ání wanlín.

Anidé mú wanlín sísí Bulu ɔpasua ání ibu Korinto wúluto pú Bulu ahá ání bubu Akaia ɔsulúsu féé.

²Aní Sí Bulu mva aní Wíe Yesu Kristo bugyíi mli buale, abuha mli iwilwii.

Paulo Bulu Ipánda

³Mliha akanfu Bulu. Mbugyí aní Wíe Yesu Kristo mu Si pú mu Bulu. Mbugyí aní Síá otowun aní nwe pú aní Buluá otolwíí aní klun ɔkpagyíɔkpasu! ⁴Otolwíí aní klun aní asun wunhe kugyíkɔtɔ, méni aní é abétalí pú klun lwiíhé ámúú anlanyá tsú mu wá ámu lwíí aní aba klun amú asun wunhetɔ. ⁵Alí ámúú Kristo léhie wun ipian kɔnkpɔnkpɔnti, aní é anidé mú ku wúun amu a, alí kén Bulu ná Kristosu ɔhíé ɔde aní klun lwíí ní. ⁶Mú su ní anidé ipian wúun a, mli iwilwii pú mli nkpahɔɔ su anidé mú wúun. Tsúfé Bulu dé aní klun lwíí, méni aní é abólwíí mli klun, fówun mlétalí nyá klun, tomi wun aní ipian ámu odu kén. ⁷Ifú medé aní mli su, tsúfé anyin ání ania mlynɔ dé ipian ámu wúun. Mú su Bulu obólwíí mli klun fé aní.

⁸Apío, ibu aléá mlébi ání iwɔsun ámúú anlówun Asia ɔmátɔ ámu ɔnɔ lehie wá ɔnlun. Iekle dun aní. Ifú ləkítá aní, aníkí ání abówu kokooko. ⁹Ɔnɔkwali asún, ulɔbwe aní fé bahá aní lowu ipón. Táme alá anımɔɔpu ansí dínká aní iwɔsu, mboún Buluá ɔtɔkúsúa awupúsú, su uléba alí. ¹⁰Lélé

mú á, ɔlele anɪ tsú lowutɔ. Anlahogyi ání obétsiá lé anɪ brégyíbré. ¹¹Ɖbéle anɪ, tsúfé mlúdé mpáí bɔ anɪ nwunsv. Ínu sv ahá tsɔtsɔtsɔ béda Bulu ipán anɪ nwunsv, tsúfé alawá awitɔle há anɪ, mpáí ámúú ahá tsɔtsɔtsɔ budebo há anɪ ámu sv.

Paulo Nhíhé Tse

¹²Abétalí pú ibi sí kántɔ anɪaa anɪ klɔn mókúhá anɪ pón anɪ nkpatɔ, títriu anɪa mlɔnyɔ nátitɔ. Megyí anɪ ɔsulúv anɪfɪsv nyánsa anɪlópɔv anɪdé anɪ agyúmá yɔ, mboún Bulu awitɔle sù anɪlatálí lé iwitɔ anɪdé tógyítɔ bwe ɔnɔkwálɪsv. ¹³⁻¹⁴Tsúfé megyí asún ání mlíméetalí kla, nu mú asɪ anɪtɔwánlín sísí mli. Ibo mútɔ́á mlímédé mú asɪ nu yi, táme nahogyiá mlóbonu mú asɪ wankláán ekekú. Fówun mli é mlétalí pú anɪ tsú iwɪ, fé alíá anɪ é abópɔv mli tsú iwɪ anɪ Wíe ɔbáke amv.

¹⁵Mí ansí dɪn asún ánfɪsv. Mú sv nɔbwe agywun ání néba mli wá, méni mlénya oyúla anyɔ. ¹⁶Múgyí, nótɔsv mli wá yó Makedonia. Ní neyínkí é nélatɔsv mli wá; fówun mlétalí sí mí ɔkpa, néyínkí ba Yudea ɔmátɔ. ¹⁷Mléfíté mliaa, ntogyi sù nalátse mí agywun. Ntée nabwé fé ɔyítɔ ahá ámúú buteblí beɛ, “Ee” latsé amú ɔnɔ beɛ “Ó-o” amvɔ ɔku? ¹⁸Alí ámúú Bulu bɔ ɔnɔkwálɪ, ɔtamawá afunu amv a, alí mí “Ee” igyi mí “Ee” ní. ¹⁹Tsúfé Bulu mv Bi Yesu Kristo amv tamablí ɔbéɛ “Ee” latsé mú ɔbéɛ “Ó-o.” Mv mú á, “Ee” kóún ototsúlá. Mv iwɪ asún ɔkan mía Silas pú Timoteo anɪléda súná mli ní. ²⁰Tsúfé mutótsúlá “Ee” há Bulu nhíhé kugyíku iteba mútɔ́. Mú sù akánfú Bulu tá á, anteblí anɪaa, “*Amen!” ni. ²¹Bulu téhá anɪa mlɔnyɔ anɪtetálí líí kínkíínkín anɪa Kristonyɔ ikulebwetɔ. Mvgyí ɔhá ání ɔleda anɪ ofúli. ²²Mv kén lópɔv *Ɖɛ Wankíhé amv wá anɪ klɔntɔ, púhíe anɪ nsu; isuna ání mvbú anɪ, ɔbɔbwe tɔ́á ɔlehie há anɪ.

²³Bulu ɔbíti mí isv ní megyí ɔnɔkwálɪ nde mli bláa. Alíá mméeba bowun tsitsa kuku blí tsú mli iwɪ sù mmetrá bɔtsɔv unv. ²⁴Anɪmédékléá íbɔbwe fé anɪdé mli hie alíá mlópɔv mli hógyi yó agyúmá. Mboún alíá ansí bégyi mli

sú anta mɔnyɔ anidé agyómá yɔ. Anyin ání mli hógyi su mlílí kínkínkín dodo.

2 ¹Mú su nabwé agywun ání mméetrá ba bɔwa mli awirehɔ. ²Tsúfé ní nebá bɔwa mli awirehɔ á, ma ɔbéha ansí bégyi mi dun mli ámúbú nawá awirehɔ ámu? ³Mú sú nɔwanlín ɔwulú gyankpapo amu sísí mli ní. Fówun ní nebá á, mli ámúbú mléha ansí bégyi mi ámu mluméela há awirehɔ mboún ikita mí. Tsúfé mí ansí dun mli féésú ání ní ansí de mí gyí a, mli é ansí bégyi mli. ⁴Megyí ansigyí nɔpɔwánlín ɔwulú ámu. Asún ihíé de mí háan, ndesú asa nɔwanlín mú! Táme megyí alá néha mlégyi awirehɔ su nɔwanlín mú. Mboún alá mlébu ání ntehié dwé mli su.

Lakpansikíé

⁵Ɔhá ámúbú ɔɔpɔ asún ba ɔpasua ámɔɔ ámu mɔkúpú ɔlala gyi mi. Ní beɛ bukú mú á, ɔpasua ámu féé alapú asún gyí. (Mmedékléá nɔdun mú blí.) ⁶Isɔbití ámúbú mli ɔdɔdɔ mlilébití mu amu itsɔ mu. ⁷Ulafun ání mlésikíé mu, yíá mu klun ngya. Fówun asún mɔɔdun mu, iwɛ móowu mu. ⁸Mú su nokókóli mli, mlile suna mu ání mlitráa mlɛbɔ mu iwɛ ɔdwe. ⁹Ndekléá nébi ní mlitegyi mí asún ámu féésú. Mú su nɔwanlín ɔwulú ámu ni. ¹⁰Ní mlesíkíé ɔku á, mí é nasíkíé mu. Ní nesíkíé mu é á, mli sú nasíkíé mu Kristo idátɔ, ní ilehián ni, ¹¹méni Ɔbunsám oméenya anɛ iwɛ ɔkpa, tsúfé anyin ikpa ání ɔtɔtsun mósú féé.

Paulo Klun Médi Mu Asi

¹²Bréá neba Kristo *asun wankláán ámu ɔkan ɔdakpá Troa wúlutɔ á, nowun ání anɛ Wíe lafínkí ɔkpa há mí. ¹³Táme mí klun médi mí asi, tsúfé mmɔtɔ mí pió Tito unu. Mú su neklá amú ká tsun yɔ Makedonia nsáuntɔ.

Isɔgyí Kristo Idátɔ

¹⁴Táme nde Bulu ipán da ání Kristo isɔgyí su alabwé anɛ ndoun, alakpá anɛ buo iwɛ, anidé mu isɔgyí amu nke gyí. Ní ayɔ ɔtínegyíɔtíne a, ɔtɔtsun anɛsu bláa ahá ámu Kristo asun

wankláán ámu, fé alíá ofobí fánfán tɔwá ofan yɔ tsútsúútsú. ¹⁵Lélé mú á, Kristo gyí atɔ tɔhé, angyí mú ofan ání idekusú há Bulu, há ahá ání buɗe nkpa nya pú amóá buɗefwi féé. ¹⁶Itobon ahá ání buɗefwi, kpá amú ya lowutɔ, utɔwá ahá ání ɔɗe amú nkpa hɔɔ ofan, kpá amú ya nkpatɔ. Ma mee lófun ha gyuma ánfɔ odu yɔ? Ɖhaa má ɛnu. ¹⁷Ani mú anumégyí fé ahá ɔɗuɗɔá buɗe Bulu asún ámu fe púkle kɔba. Ínúá Bulu lówa anɔ su á, aniteblí mú ɔnɔkwaliɔ fé Kristo asúmbe ání bulí Bulu ansítɔ.

Bulu Ntam Pɔpwe Asúmpú

3 ¹Asún ánfɔ anidéblí ánfɔ itráa desuná ání anidé iwɔ kanfú súná mli lóó? Ntée ilehián ání abɔpu anɔ adánsɛ nɔwulú bá mli, ntée abɔho mú tsú mli wá fé alíá aku butɔbwé? ²Ekékekéke! Mli onutó tsiátɔ gyí adánsɛ nɔwulúá bawánlín dínká anɔ klɔnsu, ɔhagyíɔha dé mú wúun kla, púbí ání anidé agyómá wankláán yɔ. ³Mlɔgyí ɔwulúá Kristo lówanlín, ulɔtsun anɔsu ba. Táme megyí oyípe ɔɔpɔwánlín mú, Bulu Ɖkɔankpapu amu Ɖɔɔ ɔɔpɔwánlín mú. Megyí abwi pétéplé anyɔsu^a é ɔlɔwanlín mú dínká, mboún anyánkɔpúsa klɔnsu.

⁴Anɔbu ɔkpa blí alɔ, tsúfé Kristo su anɔ ansí dɔn Bulusu. ⁵Anɔyin ání anumɔfun ání abétalí bwé tɔtɔ anɔ onutó iwɔsu. Bulu sú anɔlɔfun ha tógyítɔ bwe. ⁶Muláhá anɔlabwé mu ntam pɔpwe amu asúmpú. Megyí ɔbɔ Bulu lɔpɔwánlín mú mú, mboún *Ɖɔɔ Wankíhé amu. Tsúfé mbla wanlínhé amu utɔpú lowu ba, táme Ɖɔɔ Wankíhé klé amu mú utɔpú nkpa ba.

⁷Mbla dada amú Bulu lówanlín dínká abwi anyɔsu ámu ulɔpu lowu ba. Táme mú numnyam léha Mose ansítɔ léhie wankí asa ɔɔpɔba Israelfɔ. Bréá numnyam amu ɔnɔ ide asɔbá ó á, bumetalí kɔ mu ansítɔ. ⁸Ínúá mbla wanlínhé amu lénya numnyam alɔ á, múmú Ɖɔɔ Wankíhé amu gyumagyihe numnyam ɔbéhɛ dɔn mú! ⁹Mbla wanlínhé amú ɔtehá

^a 3:3 Abwi pétéplé anyɔ amú Bulu lówanlín mu Mbla dú dínká mósó há Mose amu.

anitegyi ipɔn ámu kúráá ibu numnyam. Múmú nkáli Dɛ Wankíhé gyumagyihe amúú ihíé bu numnyam dun mú ámu ibɔ́bwe? Tsúfé itehá anitegyi asu Bulu ansító! ¹⁰Múmú idesuná ání Bulu mbla dada amu itráa ma numnyam kúráá. Pɔ́pwe anfi numnyam lagyi músú. ¹¹Tsúfé ní Mbla dada amúú imetsiá wá ɔ́pá ámu ibu numnyam ali á, múmú pɔ́pwe anfi ibétsiá bré féé ánti klé ibéhié dun mú!

¹²Ani ansí din ntam pɔ́pwe anfisv. Mú sv anibv ɔ́kpa tóí faan. ¹³Anumégýí fé Mose ání oletsíá pú tati bun nwun, méni Israelfɔ bumóowun mu ansító wankí, bréá mú ɔ́nó ude asbá. ¹⁴Táme mú óó á, Bulu léha amú klwntɔ lówa odwin bɔ́fun nde. Mú sv ní bude Bulu mbla dada amu kláa amú ofiakpa a, butamanú mú asi, tsúfé tati ámu létin amú agywun. Tɔ́tɔ méetalí bwíí tati ámu lé amú agywunsv, nkéti amúa Kristo babwé kule. ¹⁵Bótv nde kúráá ní bude Mose mbla ámu kláa a, tati ámu itráa bun amú agywunsv. Mú sv butamanú mú asi. ¹⁶Táme ní ɔ́ha onyá dámlí klwntɔ ba aní Wíe wá pé, Kristo labwíí tati ámu lé mu agywunsv. ¹⁷Ani Wíe amúú asún ánti idetɔ́í tsú mu iwí ámu gyí Dɛ Wankíhé amu ni. Ɖtínegyíɔ́tínéá Dɛ ámu ibu a, iwígyí tétsiá unv. ¹⁸Ani Wíe dé tati ámu bwíí lé aní féé ansító. Mú sɔ́ anidé mu numnyam amu le súná ní. Mu Dɛ ámu lahá anidé mu lían, tsúfé mu numnyam amu itráa dewankí anɔ́ tsía.

Ɖlɔ́tɔ́ Siadɛ

4 ¹Bulu láwun aní nwe pú agyómá ánti wá aní ibɔ́tɔ. Mú sv abatɔ tamawú aní. ²Anilakíná tɔ́á ibu péli pú oklúntɔ ató féé. Animédé ahá mlé, animédé Bulu asún ámu é damlí bun. Mboún anidé ɔ́nɔ́kwali amu onutó blí pólé iwí súná ahá féé, iwanki amú alíá anigyí Bulu ansító. ³Ní tɔ́kv ibun asun wankláán amúú anidéblí ámusv kúráá á, ahá amúú budefwi ámu nkule ibun há. ⁴Ɖbvnsám gyí ɔ́yí laláhe anfisv ogyípú. Mulápú ató tin ahá ánti butamahɔ Bulu gyi anfi ansíbi. Mú sɔ́ bumédé asun wankláán amúú igyi wanki amu asi nu ní. Wanki amu gyí Kristo. Muléhié lian Bulu numnyam ni. ⁵Tsúfé animéná animédé aní onutó iwí asún

ɔkan da. Yesu Kristo ɛwɛ asɔn ɔkan anɔdɛda anɔaa, mɔgyɛ anɔ Wɛ. Tɔ́á anɛblɛ tsú anɔ ɛwɛ gyɛ, Yesu sɔ anɔlabwɛ mlɛ asúmpú. ⁶Tsúfɛ Bulu ámúbú ɔɛblɛ ɔbɛɛ, “Wankɛ ɔdálɛ tsu oklúntɔ!” ámú kén lahá mɔ wankɛ amɔ ɔdɛwankɛ anɔ klɔntɔ. Ulahá anɔlabɛ ání mɔ numnyam amɔ ɔdɛwankɛ Yesu Kristo anɔsítɔ.

⁷Táme anɔgyɛ fé nɔ́ pwehé ání siadɛ bu mótɔ́. Siadɛ ámú gyɛ wankɛ móa túmi ání ɔdɛwankɛ anɔ klɔntɔ. Idɛsuná ání túmi kpɔnkpɔnkpɔntɛ ání imɔtsú anɔ, Bulu wá itsú. ⁸Budɛ anɔ háan ɔkpagyɛɔkpasɔ, táme bɔmɔkútálɛ sá anɔ tin. ɛwɛ de anɔ klɛ, táme mɔkúbkpɔn anɔ. ⁹Budɔn anɔsɔ, táme Bulu mótúsí anɔ há. Bɔtɛfɔn anɔ dá, táme Bulu sɔ anɔmótúkúwú. ¹⁰Anɔlatsúlá ɔdɛ anɔ ɔyɔlúb anɔ ipian brégyɛbrɛ, anɔdɛwɔ fé Yesu, ménɛ mɔ nkpa ámú ɔbɛlɔn ɔwan anɔtɔ. ¹¹Yesu súm sɔ anɔ nkpa atsiápú anɔ anɛtɛfia lowu brégyɛbrɛ. Alɔ́ ɔbɔbwe mɔ nkpa bɛlɔn ɔwan anɔ ɔyɔlúb anɔ ɔdɛwɔ ání ɔntɔ sɔ. ¹²ɛnɔ dɛsuná ání lowu dé anɔ laláa, mlɛ é mlɔdɛ nkpa ání ɔtamátá nɔya.

¹³Táme anɔbu mótú anɔdɛ Bulu asɔn ámú ɔkan da. Tsúfɛ anɔlɔ́hɔ mɔ gyɛ fé alɔ́ Israel ɛwɛ ɔwapú ámú ɔlɔwanlɔ́n wá Bulu asɔn ámú ɔbɛɛ, “Nɔ́hɔ Bulu gyɛ. Múlahá sɔ ndɛ mú ɔkan da ní.” ¹⁴Anɔyin ání alɔ́ ámúbú Bulu ɔkúsúa anɔ Wɛ Yesu tsú afúlɔtɔ ámú a, alɔ́ kén ɔbɔkúsúa anɔ, ɔbɛkpá anɔ mlɔnyɔ féé ba mɔ ɛwɛ wá ní. ¹⁵ɛnɔ féé bɔ́wa labi há mlɛ, ménɛ ní Bulu híé ɔdɛ awɔtɔɛ wa, kpá ahá ɔdɔdɔ ba Kristo wá á, bɛhɛ dá mɔ ɔpán, wá mɔ numnyam.

Hógyi Putsiá

¹⁶Mú sɔ abatɔ tamawú anɔ. ɛbu mótɔ́á anɔ ɔyɔlúb anɔ ɔdɛwɔ mú, táme Bulu dé anɔ ɔkláa ɔwɔnlɔ́n wa ekekegyɛke. ¹⁷Tsúfɛ ɛwɔsɔn kpalóbɛ ání anɔdɛwúun séi ání ɔbɛha abɛnya numnyam kpɔnkpɔnkpɔntɛ ɔtamátá, ɔdɔn ɛwɔsɔn ání. ¹⁸Mú sɔ anɔmédɛ ɛwɔsɔn ání anɔdɛwúun anɔ bu. Múá nyankpɔsa anɔsɛbi tamawun ɔkpá anɔdɛkú. Tsúfɛ ɛwɔsɔn ání ɔbɛba bɔtsɔn. Anɔsigyɛ ámúbú ɛbu ɔma, ɔbɛtsiá brɛ féé ámú ɔkpá anɔdɛkú.

5 ¹Ani ɔyulúv anfi igyi fé kantankpa ání anutsie mútɔ́. Ní bobwíé mú á, Bulu ɔbéha aní obu bámbá ɔsúsú. Múmú á, megyí nyankpusa léyi mú. Mu onutó léyi mú, imóobwie ekekeeke. ²Tsúfé séi kúráá ide aní ipian ɔsulúsv-ɔyulúv anfitɔ́. Anihíé anigyó ekeá ɔbɔpu aní ɔsúsú-ɔyulúv wá aní fé atadié. ³Múmú animɔɔbwe fé ɔhéá ima ɔyulúv, aniná yaya. ⁴Ide aní ipian, anidékmí bré ání anutráa aníbu aní ɔyulúv dada anfitɔ́. Megyí bee anidékléá awú, adali ɔyulúv anfitɔ́. Mboún anidékléá Bulu ɔwáa aní ɔsúsú klé amúbú itamawú plɔ́ ámv, ménú ibégyi mú ání itowú plɔ́ ánfisv. ⁵Bulu onutó léla aní yái há mú, ɔɔpu Dɔɔe Wankíhé amv wá anitɔ́. Múgyí ibwiá ɔledínká mósú ní.

⁶Mú sv anutɔ́wá klvn brégyíbré. Ibv mútɔ́á bré ání aníbu ɔsulúsv-ɔyulúv anfitɔ́ á, aníbu ifɔ́ aní Wíé wá. ⁷Íni sv hógyi anílapú anutsie nkpa, megyí tɔ́á ansíbi dewúun. ⁸Ee! Anihíé anidé klvn wa, tsúfé tɔ́á anihíé anidéduká gyí abówa ifɔ́ ɔsulúsv-ɔyulúv anfi wá, ayetsiá aní Wíé wá. ⁹Mú sv ní aníbu ɔsulúsv nfi o, ɔtine bambá o, tɔ́á idin aní klvsv bré féé gyí, abɔbwe tɔ́á ibégyi aní Wíé ansí. ¹⁰Tsúfé aní féé abéyélu Kristo ansítɔ́, obégyi anitɔ́ okugyíɔkv asún, ká mv ɔkv aní ɔsulúsv-ɔyulúv anfi bwehé ɔnɔ́. Yilé igyi o, lalaha igyi o.

Bulu Onyawíele

¹¹Anihíé anyin ání ilehián ání abénya aní Wíé ifú. Mú sv anidéɔtí kplá ahá anaa, amú é bunyáa mv ifú. Bulu híé oyin aní. Nahogyi ání mli é mliyin aní mli klvntɔ́. ¹²Megyí iwí anutráa anidétsu súná mli. Mboún anidé mli ɔkpa suná, ménú mlótsu iwí aní sv. Fówun ní ahá bude iwí tsu tɔ́á ɔha tɔ́pú ansíbi wun sv, imegyí tɔ́á ibv ɔha klvntɔ́ sv á, mlénýa kv bláa amú. ¹³Tsúfé ní bee aní nwun layíntá kúráá á, Bulu asún igyi. Táme ní bee aní ansítɔ́ da mú á, ida ha mli. ¹⁴ɔdwe amúbú Kristo bv ha aní ámv dé aní kpa, tsúfé anílanú iwíasi ání mv nkule lówu há ahá féé. Mú sv mv ahá féé bawú. ¹⁵Olowu há ahá féé lélé, ménú ahá ání bénya nkpa ɔpwe amv bumétrá tsiá nkpa alíá budeklé. Mboún bétsiá nkpa há Kristo amúbú olowu, Bulu lókusúa mv há amú ámv.

16Íni su antráa anumédé ɔhaa kú fé alá ɔyítɔ ahá buteki mu. Ibo mótɔ́á bré ámu anulétsiá kɪ Kristo fé alá ɔyítɔ ahá buteki mu, táme antráa anumédé mu kú alí. 17Mó su ní ɔha mua Kristo ɔɔbwé ukule a, alabwé ɔha ɔɔpwe. Mu tsiátɔ dada amu féé ulatsun. Mu tsiátɔ labwé ɔɔpwe! 18Nkpa ɔɔpwe anfi itsú Bulu wá. Múlótsun Kristosu bwé aní ánti anigyí mu alupú ánti mu anyawíe. Alapú agyúmá ánti wá aní ibitɔ, ɔbée alée aha bambá é anyawíe ha mu. 19Tsúfé Bulu lótsun Kristosu ɔde ɔyítɔ ahá damlí bwé mu anyawíe. Ɔtráa ɔmedé amú lakpan iwí akúnta bu há amú. Íni ɔɔɔpɔwá aní ibitɔ ɔbée, abláa ahá ní.

20Kristo atsiámi anigyí, Bulu déɔ́ɔ́ tson anisu há mli. Mó su anlíí Kristo ɔlúkpá anidé mli kokóli aníaa, “Mliha Bulu ɔbwe mli mu anyawíe!” 21Tsúfé Kristo mɔ́bwe lakpan kuku! Táme Bulu lóɔpɔ mu bó afɔdie aní lakpan su, méni ɔbótsun ania munyɔ ukulebwesu tsú aní ání aní asún da ɔkpa mu ansítɔ.

6 1Ania Bulunyɔ anidé agyúmá yɔ. Mó su anidé mli kokóli aníaa, mli máha Bulu awitɔle amúú mli lanyá ámu ibwe kpaali. 2Tsúfé Bulu léblí mu asun wanlínhé amutɔ ɔbée,

“Bréá mí bré lɔfun ání nówun ahá nwe a,
nonu mli ɔme.

Mí nkpa ɔhɔ́ke amu ulɔfun é á, negyi mli buale.”

Mlinu! Bré ámu láfɔn a. Nde gyí mli nkpa ɔhɔ́ke amu ní!

3Animédékléá abétin ɔhaa aní Wíe wá ba ɔkpa, méni ɔhaa méenya asvansu blí tsú aní agyúmá ánti iwí. 4Mboún aní bwehé féétɔ a, anitelé súná ání Bulu asúmbi anigyí ɔɔɔkwalsu. Anitotomi aní iwíɔsin, aní ikplán pú aní asun wunhe kugyíku étɔ. 5Bepítí aní atɔ́, wá aní obu, bekpa bun anisu dá aní. Anulóyɔ agyúmá ání idun aní. Nkekú anitamadídi, nkekú é anutetsiá akún. 6Anulótsun aní tsiátɔsu lé súná ání ifin kuku má aní iwí. Anyin asún, anutenyá uklɔn. Aníbu awitɔle, Ɔɔɔ Wankíhé amu tsie anitɔ. Anutehíe dwé ahá é tsú aní klɔntɔ. 7Anitedá Bulu asún ámu ɔkan ɔɔɔkwalsu pú Bulu túmitɔ. Yilébwe gyí isá-akɔ́ɔ́á anidéɔpukɔ

ahá, anidéputin anɪ wɪ é. ⁸Aku butobú anɪ, aku é butɔsúpa anɪ. Aku butekánfú anɪ, aku é butɔkpɔ́í anɪ. Anɪ asún da ɔkpa, táme buɗe anɪ bu afunupu. ⁹Fé anumégyí tɔtɔ ahá ansítɔ́, táme ahá anɪgyí. Fowun anɪ fɛe anidéwu ní, táme kɪ, anɪbu nkpa. Butesian anɪ mɔ, táme anitedáli mútɔ́. ¹⁰Anɪbu iwɔsɪntɔ, táme Kristo su anɪbu ansɪgyítɔ́. Ahiánfɔ anɪgyí, táme anɪlahá ahá bamlí wɪ anyapú. Anɪmá tɔtɔ, táme anɪbu tógyítɔ́ Kristo su.

¹¹Korintofɔ! Anutehíé nyá mɪ wɪ ansɪgyí, lé iwɔtɔ bláa mɪ asún. ¹²Anɪtamakólá wɪ mɪlɪsɔ, táme mɪ mú mɪlɪdé wɪ kulá anɪsɔ. ¹³Nɗe mɪ asún bláa fé mí onutɔ́ abí. Mɪ é mɪmápu asvansɔ ɲáín anɪ.

Ɔmátɔ́fɔ Pɔgyi Mba

¹⁴Mɪa ɔmátɔ́fɔ mɪmágyi mba. Nkálɪ yilé mɔ́a lalahe bétalí tsíá tsukule? Nkálɪ wankɪ mɔ́a oklún é bɔ́bwe kule? ¹⁵Kristo mɔ́a Ɔbunsám^b bétalí bwé agywun kule? Ekekeke! Nkálɪ ohógyipu mɔ́a ɔhá ání ɔma hógyi bɔ́bwe kule? ¹⁶Nkálɪ bɔ́tswe ɔkpi Bulu ɔtswékpa? Tsúfé anɪgyí Bulu Ɔkɪankpapu amɔ ɔtswékpa nɪ. Igyi fé alíá bɔ́wanlín wá Bulu asún ámutɔ́ bɛɛ,

“Bulu ɔbée, ‘Nétsiá mí ahátɔ,
mía amúnyɔ abénatí.
Nɔ́bwe amó Bulu,
amó é bɔ́bwe mí ahá.’ ”

¹⁷Bɔ́wanlín wá Bulu asún ámutɔ́ é bɛɛ,

“Anɪ Wíe Bulu ɔbée,
‘Mɪlɪdalɪ amútɔ́, amlɪmaɪn wɪ le amúsú.’ ”

Betrá wanlín wá Bulu asún ámutɔ́ bɛɛ,

“Mɪmáwa ɪbɪ lalahetɔ,
mí anɔ́ mɪ.”

¹⁸Betrá wanlín wá Bulu asún ámutɔ́ bɛɛ,

“Bulu ɔbée, ‘Nɔ́bwe mɪ Sí,
mɪ é mɪɔ́bwe mí abí.’ ”

^b6:15 Paulo létɪ Ɔbunsám ɔbée, ‘Belial.’

Alí aní Wíe Otúmípu dɛblí ní.”

7 ¹Mí apíó adwepó, Bulu lahié ntobíá igyi ahi yáí aní. Mú su mliha afwí ibi le tógýítsá íbókpoí aní ɔyulúv pú aní ɔkláa féétó. Mliha anya Bulu ifú, ménu íbéha aní iwí bétun, ifin kuku méetrá tsiá aní iwí.

Paulo Ansigyí

²Kókoli, mlímákulá iwí anísv! Anímókópú lalaha gyi ɔhaa. Anímókúyíntá ɔhaa, anímókúsísi ɔhaa é. ³Megyí ipón nde mli ha sù nde asún ánfí blí. Tsúfé nablí bɔtsun mbée, anitekile mli asún. Lowuto o, nkpatɔ o, aníméetan mli sv ekekeke. ⁴Ntetáí bla mli mí kluntɔ asún, nde iwí é tsu mli sv wankláán. Aní ipian féé ɔma a, mlilawá mí atetɔ-ɔnlun. Ansigyí kpɔnkpɔnti ku labúlá mí kluntɔ.

2 Ko

⁵Tsúfé bréá anilówie Makedonia a, aníménya ɔkpa dá ɔkpónú. Atsun nfi asún, ayínkí nfi utré. Mú sv ifú letsia aní ayetɔ. ⁶Táme Buluá otolwíí ahá ámúb iwí lawú amó uklun amu lékpa Tito ba aní, púlwíí aní uklun. ⁷Megyí mu íbá amu nkule léha uklun lolwíí aní, mboún asún ání ɔɔpɔtsúa usv ba é. Ɖlebláa aní ɔbée, mlihié mlidékléá mlówun mi. Alíá asún ámu lahan mli, mlilanú iwiasí ání mlímébi bwé pú alíá mlilahíé tsúlá dínká mí klésv, sv ansí letrá gyi mi tsiá.

⁸Tsúfé ní mí ɔwulú ámvto asún lehan mli kúrää á, mí mú umehan mi. Uvú mótóá ílehan mi bré kutɔ, tsúfé nowun ání íleha awírehɔ lékutá mli kpalobí. ⁹Ansí de mí gyí séi. Megyí alíá ílɔwa mli awírehɔ sv. Mboún alíá awírehɔsú amu ílahá mliladámli kluntɔ sv. Tsúfé mli awírehɔsú anfi odu Bulu tekile ni. Mú sv mí asún ámu imeyintá tɔtɔ tsú mli iwí. ¹⁰Tsúfé awírehɔsúá igyi Bulu apé tɔpú kluntɔdamli bá. Ltehá anutenyá nkpa. Mú odu bv ɔsun, táme uma ɔsun. Ɖyítɔ awírehɔsú mú á, lowu ítɔpúba. ¹¹Mliki tóá awírehɔsúá igyi Bulu apé latí há mli! Ulahá mlilatsú íkv lé asún ámvto, mlidésuná ání mli asún da ɔkpa sv ɔblí é de mli. Ulatsíí mli opúni, ílahá mlihié mlidékléá mlówun mi, mlilatsúlá dínká mí klésv. Mlihié mlidédunká ání mlébutí lalaha ɔbwepó ámu usv. Lélé, mlilalé súná ání mlímégyi pón asún ánfítɔ.

¹²Nɔwanlín ɔwulɔ sísí mli, táme megyí ahá ánfɩ su. Megyí ɔhá ámúú ɔɔɔwe ulá, ntée ɔhá ámúú ɔɔɔpu ulá gyí mu amu su. Alá néle súná mli Bulu ansítɔ ání mlulatsúlá dínká mí klésu mboún su. ¹³Ínu lahié wá anɩ atetɔ-ɔnlɩn.

Múá idɔn kúrará á, ansí legyi anɩ, bréá anilówun ání mli féé mlilahá ansí de Tito gyí, tsúfé mlilahá uklɔn ladí mu asɩ. ¹⁴Ní nekanfú mli mu ansítɔ kúrará á, mlíméha pélu mekitá mí. Alí ámúú asún ámúú anulébláa mli ámu féé igyi ɔɔɔkwali amu a, alí kanfú ámúú nekanfú mli mu ansítɔ ámu é laba mótɔ ní. ¹⁵Ní Tito ɔkáín alíá mli féé mliteyaa asu há mu, ho mu asun blíhé, pú alíá mletenyá ifú kpínkí mu ansítɔ á, ɔtetráa nya mli iwɩ ɔdwe tsía. ¹⁶Ansí ihíé de mí gyí ání nétalí pú ansí dínká mli su ɔkpagyíɔkpasu.

Akristofɔ Atókíe

8 ¹Apíó, anudékléa mlibú awitɔléa Bulu lawá há ɔpasua ámúú bubu Makedonia ɔmátɔ ámu. ²Ínuá bubu ipian múa asun wunhe tsɔtsɔtsɔtsɔ kúrará á, bɔpu amú ohian futútúútú lé amú awitɔle kpɔnkɔɔnkɔntɩ súná ansigyísú tsun amú atokiehétɔ. ³Néblí mbée, bekie atɔ dun alíá bétalí kúrará, tsú amú kluntɔ. ⁴Betsiá kúlí anɩ ɔkpa bée, ahá amú é abunya ɔkpa wa awitɔle ha Bulu ahá ání bubu Yerusalem. Fówun amú é amú ibi bówie osum agyómá ánfɩtɔ. ⁵Bɔbwe dun alíá anilósusúu. Gyankpapu a, besi amú iwɩ há anɩ Wíe, belasí amú iwɩ há anɩ Bulu apétɔ. ⁶Mú su anilahá Tito amúú olegyankpá beha mlilówa nsi ámu aníaa, ɔtráa yinki beha amlɩwa nsi mɔ mli awitɔle agyómá ámu ɔnɔ wankláán. ⁷Mlulafun ɔkpagyíɔkpasu, tsúfé mlíhié mlibu hógyi, mlyin tɔí, mlilétun ansí. Tɔtɔ tamakɔn mli, mlitehíé dwé anɩ é. Ndekléa mlibɔɔ mbódí awitɔle agyómá ánfɩ étɔ dun ɔhagyíɔha.

⁸Mmedé mli hie mbée, mlibwée mú. Mboún ndepu mli ɔdwe kápú akvá budeprú ání amú é bɔbuá. ⁹Tsúfé mlyin alíá anɩ Wíe Yesu Kristo lódwe ahá, wá awitɔle. Iwɩ onyapú ogyi tekɩ, táme anɩ su ɔɔbwe iwɩ ohíáni, ménti abótsun mu ohian ámusu bwé iwɩ anyapú.

¹⁰Mí agywun gyí, ní mlɔmɔ agyómá ámúb mlíléfi así ofíku ámu ɔnɔ á, íbɔwa labi há mli. Tsúfé mlgýí ɔpasua gyankpapu ání mlílɔbwe agywun ámu, mli kén léfi mú así.

¹¹Mlɔwuna bwe mú mɔ ɔnɔ. Mlile íklɔntɔ bwe mú, fé alíá mlíléfi mú así. Mlíkie mú mli ɔwɔnlín ɔnɔ, méni íbékanáa agywun ámúb mlílɔbwe ámu. ¹²Ní ihíé igyi mli apéá mléha á, mlíkie tɔ́á mlibu. Mútegyi Bulu ansí, megyí múá mímá.

¹³Megyí bæe, anídékléá abéha íwí bólwií aku, íwí íkli mli mú; mboún alíá íwí bólwií mlíá amúnycó féé kékéé. ¹⁴Séi mlibu atɔ́ tsɔtsɔ́á mlétalí púbbúa amú. Múmú ní íwá alé há amú, íwí leklí mli é á, amú é bétalí búá mli, méni mlíá amúnycó féé mlénya kékéé. ¹⁵Mlíkaun ání Bulu asun wanlínhé amu léblí ɔbéé, “Dhá ámúb ɔlekpa tsɔtsɔtsɔ́ amú ménya mú dubi. Dhá ámúb ɔlekpa kpalobí ámu é klé íɔfun mu.”

2 Ko

Tito Mva Mu Aba

¹⁶Adá Bulu ípán ání alahá Tito é latsúlá dínká mli klésv fé mí. ¹⁷Bréá anúlɔ́wa mu aníaa ɔbá mli wá á, olotsulá. Mu onutó óó, íbu mu ɔdwe ání ɔbétrá ba íwí. ¹⁸Anídé mva opió ɔku wa sísí mli. ɔpasua ámu féé bude mu kanfú, asun wankláán ámu ɔkan da su. ¹⁹Makedonia ɔpasua ámu féé léle mu ání ania múnycó anátí kí, ahɔ atokiehé ámu ya Yerusalem. Anídé atɔ́ ánfí bwe púwá aní Wíe numnyam, méni íbósuná ání aní onutó latsú dínká íwísv ání abɔ́bwe mú.

²⁰Anídé aní íwí kí wankláán, méni ɔhaa mééle aní ílá, tsú alíá anúlɔ́pu anídé atokiehé ámusu kí. ²¹Tɔ́á anídésusúu gyí, alíá abɔ́bwe múá ída ɔkpa Bulu mva anyánkpúsa féé ansítɔ́.

²²Íni sv anílapú aní apíó ámvtɔ́ ɔku mántá Tito anású. Anílasɔ́ mu kí, anílawun ání ɔhíé ɔbu nsi. Alahɔ mli gyi séi. Mú sv ɔhíé odekléá ɔbétsa aní agyómá ámu yc. ²³Ní ɔku léfuté musu á, mlibla mu mlíaa, mía múnycó dé agyómá yc púsúm mli. Makedonia ɔpasua lɔ́wa apíó atráhe amúb mva amúnycó bebá ámu. Íni désuná ání Kristo bude numnyam wa. ²⁴Mú sv mlile mli ɔdwe suna amú. Isuna ɔpasua ámu féé ání mli sv aníbu ɔkpa tsú íwí.

Akristofɔ́á Buma Tɔ́to Buá

9 ¹Imehián ání nɔ́wanlín mli ɔ́wulú tsú alíá mlidé Bulu ahá ání bubu Yerusalem buá iwí. ²Tsúfé nyin ání mlihié mlidékléá mlóbuá amú. Nagyi mli iwí adánsiɛ súná amú mbéɛ, tsú ofíku ɔ́pá Akristofɔ́á bubu Akaia ɔ́sulúsu beda iwísu yáí ání bóbuá. Mli nsiwa lahá ogyá ku lawíé amú ɔ́dudɔ́ɔ́. Mú su amú é bafi mú así. ³Táme nde apíó ání wa sísí mli, isuna ání megyí kpaali negyi mli iwí adánsiɛ súná amú. Mlida iwísu, fé alíá nebláa mli yáí, amlíka mli tswitswí féé. ⁴Tsúfé ní Makedonia Akristofɔ́ ámutɔ́ aku bobuo mi ba unu, bowun ání mli mɔ́kúdá iwísu fé alíá nebláa amú á, abósupáa amú ansítɔ́, táme mlósupáa dun mli. ⁵Mú su nabwé agywun ání néha Tito muv mu aba ámu abugyankpa ba mli wá, iha amlidunka tɔ́á mli léhiɛ ání mléha yáí. Táme mliha mú tsú mli kluntɔ́, megyí ɔ́hié igyi.

⁶Mlíkaun ání ɔ́há ání odú kpalobí á, kpalobí ɔ́ɔ́kpɔ́tí, táme ɔ́há ání odú tsɔ́tsɔ́ ɔ́kpɔ́tí tsɔ́tsɔ́. ⁷Mli ɔ́ okugyíɔ́ku ɔ́háa múá ɔ́béta lí tsu mu kluntɔ́. Imábwe ɔ́hié, tsúfé ɔ́há ání ɔ́ɔ́pú ɔ́dwe kíé atɔ́ asún Bulu tekle. ⁸Bulu téhá mli tɔ́á mlidéhián brégyíbré, dun alíá ilehián mli. Mú su mlénya tɔ́á ide mli hián brégyíbré. Ibófun mli sian, mlópubwé yilé há aha bambá. ⁹Fé alíá ɔ́wanlín wá Bulu asún ámutɔ́ beɛ, “Bulu ɔ́ha telé iwíɔ́ kíé ahiánfɔ́ atɔ́.

Mu yilébwe tamatá.”

¹⁰Bulu téhá adɔ́ɔ́pɔ́ atɔ́-abí butodú, ɔ́tehá ahá atogyihe. Mli gyí fé amú. ɔ́béha mli atɔ́-abíá mlópu iku kíé ahá, atogyihe tsɔ́tsɔ́ɔ́tsɔ́ bédali tsu mli yilébwe ámutɔ́. ¹¹ɔ́béhiɛ yúlá mli ɔ́kpagyíɔ́kpasu, méni mlówa awíɔ́le há ahá brégyíbré. Ínu ibéha ahá ámu béda Bulu ipán, atɔ́ ámú mli lapútsun anísu há amú ámu su. ¹²Tsúfé atoku anyɔ́ ɔ́béda lí tsu mli atɔ́ hahé ánífitɔ́. Megyí atɔ́ ámú mli lapúhá Bulu ahá ámú atɔ́ de amú hián, bubu Yerusalem amu nkule, mboún ibéha ahá tsɔ́tsɔ́ɔ́tsɔ́ béhiɛ dá Bulu ipán. ¹³Tsúfé ní mléhá amú á, ibéha békanfú Bulu. Ibósuná ání lélé mlidé Kristo asun wankláán ámú mli lóhɔ́ amusu gyí, mlidé

awitɔle é wa há amúa aha bambá. ¹⁴Béhié káín mlisu, bó mpái há mli, tsú awitɔle kpɔnkpɔnti á múú Bulu lapúhá mli ámu sv. ¹⁵Adá Bulu ipán há mu atokiehé ánfɪ idun blí ánfɪ!

Paulo Gyumagiye Ɖɔ́le

10 ¹Ubu mútśá mlitɔ aku mliteblí mlíaa, ní mbu mli wá á, mí asún lolwií, táme ntɔwánlín mí nwulú túmisu. Táme mí Paulo nde mli kokóli mbée, mlipúkɪ alá Kristo asún lolwií, ɔleba iwiasɪ. ²Mlitɔ aku budeblí beɛ, mí bwehé lalian ɔyítś ahá. Mú sv ní netrá ba unu á, nawun ání ilehián ání mí ansítś bówa ɔnlun. Kókoli, mlumáha ampu tsiátś anfi odu ba unu. ³Ubu mútśá yí ánfɪtɔ anibu, táme megyí yí anfitɔ agywun anidépukś isá. ⁴⁻⁵Megyí ɔyítś akɔtś anidépukś. Bulu akɔtśá ibu túmi anidépúbwíé okpikplikpa kugyíkuá itɔkúsú líí Bulusu. Anitɔpúyíntá afunu asún kugyíkuá ahá butɔpútsú iwɪ, itehá amú butamabí Bulu. Anitɔpúdámli agywun laláhe kugyíku, há itobú Kristo. ⁶Ní mli aha tráhe amu mlilapú iwɪ há Kristo, mlidé mu asúnsú gyí a, abébití ahá á múú bude asutɔ-ɔnlun wa ámu é asu.

2 Ko

⁷Mlíki ɔɔkwali amúú ida mli ansítś ámu. Ní mlidékúá Kristo bú mli á, múmú mlíki mú wankláán, amlibi ání mubú anɪ é. ⁸Ní nde iwɪ tsu túmi á múú anɪ Wíe lapúhá anɪ ámu sv dubɪ a, uma mí péli. Tsúfé ɔɔpvhá anɪ ɔbéɛ, apúbva mli amludan. Megyí ɔbéɛ, apúyinta mli. ⁹Imábwe mli fé nde nwulú wanlín, púwá mli ifú. ¹⁰Tsúfé aku beɛ, “Mákpla Paulo. Mu asun wanlínhé bu odwin, ɔɔpúhíé ahá. Táme ní mu onutó ɔbu anɪ wá á, lolwií, mu asun blíhé é uma ibíá!” ¹¹Iwánkɪ ahá ámu ání asún ání anitɔwánlín sísí ahá kén anitɔbwé ní anibu amú wá ní.

¹²Lélé mú á, amendɪ anigyíá abópu iwɪ kápú ahá ánfɪ bude iwɪ kanfú ánfɪ? Amú wulewule dépu iwɪ kápú aba, bude ansí pudínká abasu. Mimlá igyi amú. ¹³Anɪ mú anumóotsu iwɪ dáfá, mboún ɔkpa á múú Bulu léhié há anɪ ámu ɔnś abótsu iwɪ fun. Múgyí agyúmá ání anilabwé bɔtu mli ní. ¹⁴Anilégyankpá pú Kristo asun wankláán ámu ba mli. Mú sv ní anidé mli asún bláa a, anumókútśí dáfá.

¹⁵Anumédépu ɔhaa agyómá é tsú iwɪ. Mboún anidé ɔkpa kú ání mli hógyi bédan. Agyómá ámúbú anidéyɔ mlɩɩ ámu é ɩbékléi tsía. ¹⁶Múmú abétalí dáfá mlɩsu yéda asun wankláán ámu ɔkan ɔmá bámbá ésú, ménu ɩmɔɔbwe fé anɩlapú ɔtínéá ɔku lagyankpá yɔ agyómá tsú iwɪ.

¹⁷Táme Bulu asun wanlínhé amu léblí ɔbéé, “ɔhagyíɔha ání ɔbéé, mótsu iwɪ á, ɔpúbú tsá anɩ Wíe labwé tsu iwɪ.”

¹⁸Tsúfé ní Bulu ɔkánfú fú gyí asún, iwɪ kanfú mú kpaali ígyi.

Paulo Mva Sumbí Ayɔpú Afunupu

11 ¹Mlɩnya klɩn, amlɩnu mí mimlála kpalobí ánfɩ asɩ! Kókoli, mlɩnya klɩn ha mɩ. ²Mmesi mli tswɩ fé alɩá Bulu tamasi mli tswɩ. Tsúfé mli gyí fé obitebíá omeyín oyin, napú mli há oyin ɔkɩlé, ogyi Kristo. ³Táme alɩ ámúbú iwɔ ámu lópu mu alape mlé *Hawa amu á, ifú de mí ání ɔku ɔbémlé mli, mli ansí bédinkí ɔnɔkwaliwa pú ɔdwe wankíhé amúbú mli bu ha Kristo amusu. ⁴Tsúfé nyin ání ní ɔku ɔbá beda Yesu bámbá ɔku iwɪ asún ɔkan súná mli, imegyí ɔmɩamúbú aniléda mu iwɪ asún ɔkan súná mli ámu a, mlɔkɔsí hogyi. Ní mlenyá ɔhé bámbá kvá una ɔtsan há múámúbú mlilégyankpá nyá ámu é á, mlɔhɔ mú gyí. Alɩ kén ní mlonú asun bambá ání una ɔtsan há múámúbú anilébláa mli ámu é á, mlɔkɔsí hɔ músú gyí nɩ!

⁵Mmedéhógyiá ahá ánfɩ bude iwɪ tɩ “*Sumbí ayɔpú akpɔnkpɔntɩ” ánfɩ buɔɔn mɩ ɔkpa ɔkɩkusu. ⁶Ní mmeyín tɔí kúráá á, nyin asún ání ndeblí. Nahogyiá anulahá asún ánfɩtɔ ulawánkí mli ɔkpagyíɔkpasu.

⁷Ínúá nɔpu iwɩasɩbá pú obú há mli bréá neda Bulu asun wankláán ámu ɔkan súná mli, mmɔhɔ mli tɔtɔ su yéé tsitsa nɔbwe á? ⁸ɔpasua bámbá atɔ nɔswí, púbá bɔyɔ agyómá há mli. Mú su netalí súm mli, mmɔhɔ mli tɔtɔ nɩ. ⁹Bréá mbu mli wá, iwɪ leklí mí á, mmesi ipian tswɩ mlɩɩ ɔkɩkusu. Mboún apíó ámúbú botsu Makedonia ba amu léha mí mí atohiánhé. Ínɩ su mmesi ipian dínká mlɩɩ ɔkɩkusu, mméesi dínká é. ¹⁰Ínúá ɔnɔkwali nenyá ndeblí tsú Kristo

ɪwɪ mú á, ɔhaa méetalí ká mí itin ɔbéɛ, mmápu asún ánfɪ tsú ɪwɪ Akaia ɔsulúsu fée. ¹¹Ntogyi su? Ntamadwé mlɪ lóó? Ekekeke! Bulu yin ání ntɔdwé mlɪ!

¹²Nɔ́bwe mí agyúamá fé aliá nde mú bwe dodo. Nɔ́bwe mú pútɪn amú ɔkpa, ní bude ɪwɪ tsu beɛ, gyuma kule ania amúnɔ anidébwe. ¹³Afunupu bugyi. Bapina bwe ɪwɪ fé Kristo sumbí ayɔpú, buna bude mlɪ mlé. ¹⁴Táme uma wánwan! Tsúfé ɔbunsám kúráá tektí ansí bwé ɪwɪ fé *Bulu-ɔɔɔpu wankíhé! ¹⁵Mú su uma wánwan ání mu asúmpú anfi é bapina bwe ɪwɪ fé yilé abwepú. Amú ɔnómɔ béle amú bwehé kugyíku ɔwan.

Paulo Asun Wunhe

¹⁶Ntráa nde mlɪ bláa mbéɛ, ɔhaa mábu mí ɔha mimláhe. Táme ní mlidé mí bu ali óó á, mlɪtsu mú ali, mí é anya ɔkpa tsú ɪwɪ kpalobí. ¹⁷Anɪ Wíe tamatɔ́í ali, támɛ nabwé ɪwɪ fé ɔha mimláhe. ¹⁸Ahá tsɔtsɔtsɔ butotsú ɪwɪ fé ɔyítɔ́ ahá, su mí é nótɔsu ɪwɪ. ¹⁹Ee á, ínɪá mlɪaa atiansɪpu mlɪgyí óó á, mlɪtotsúlá há aha mimláhe. ²⁰Tsúfé ní ɔku ɔpú mlɪ bwé nkɔ́pábi kúráá á, mlɪtotsúlá. Ní ɔpú mlɪ nyá ɪwɪ, ogyi iwíe mlɪsu, obú mlɪ tɔku odu, ɔdá mlɪ ɪsɔtɔ kúráá á, mlɪtotsúlá há mu. ²¹Mlɪa mma ansítɔ́-ɔnlɪn. Ee, natsúlá. Mí klé ma unu.

Táme tógyítɔ́á ɔku labwé ɔdeputsú ɪwɪ á, mí é nétalí pú mí kle tsú ɪwɪ. (Táme nahogyi ání igyi mimlála.) ²²Ní beɛ *Hebrifɔ́ búgyi á, mí é Hebriyin ngyi. Ní Israelfɔ́ é bugyi á, Israelyin mí é ngyi. Ní beɛ botsú *Abraham abí-anátɔ́ a, unu mí é notsú ní. ²³Beɛ Kristo asúmpú bugyi? Mblí mú mimlásu, ndun amú! Nayírɪ ɪwɪ yɔ́ agyúamá dun amú. Nadí obu dun amú. Badá mí dun amú. Nesian wu bré tsɔtsɔtsɔtsɔ. ²⁴Yudafɔ́ banwén mí mplɪ tsé advasa-kwebá (39) tse nu kéké. ²⁵Romafɔ́ é bapítí mí atɔ́ tse sa kéké. Beda mí abwi ɔsáwule. Tse sa kéké ntsusu-yibi labun mi, nasin ntsutso ekewóle owítɔ́. ²⁶Mí ɔkpa tsɔtsɔtsɔ́ tutɔ́ á, nafá ntsu akɔ́nkpɔ́ntɪ, natsun ogyo atswapú ɪbɪtɔ́ dáli. Natsun ɔmá bámbásúfɔ́ pú anɪ pɪ Yudafɔ́ fée ɪbɪtɔ́ dáli. Natsun awúlusu pú adimbísú, nafá ɔpu. Natsun ahá ámúbú bude amú ɪwɪ tɪ beɛ, Akristofɔ́ ámu aná fée ɪbɪtɔ́ dáli. ²⁷Nayɔ́



Bɔpu Paulo wá lakpátɔ, lé mu tson ikwito, kplí mu yi buntii ání bɔpwe wá wúlu amu ɔma. (2 Korintofɔ 11:33)

agyómá kpéklé, ulapián mí kɪ. Ntamadídi nkekú. Ntetsiá akún mɔ́a ɔmewóli, nteklí ɔ́ɔ, ntedí atsalu, náti yayá aná fée. ²⁸Ínu fée ɔma a, tɔ́a ɪdɪn mí klɔnsu, ntɔgywɪn mú ɪwɪ ekekegyíeke gyí ɔpasua ámu fée aléwa. ²⁹Ma lópɔn, mmotsu kuku lé mu asúntɔ́? Ma bekpá wá lakpantɔ, ɪmɔwa mí ɔbló.

³⁰Ní beɛ ntsú ɪwɪ á, ntobíá ɪtehá mí hógyi tɛba asɪ nɔ́pɔtsú ɪwɪ. ³¹Bulu, ogyí anɪ Wíe Yesu mu Sɪ, ɔ́lekanáa kanfú bré féétɔ́ ámu yin ání mmedé afunu wa. ³²Owíe dehen Areta léha mu ɔ́má́sú ɔ́kípɔ léyete mi Damasko wúlu ɔ́ɔ, ɔ́kita mí. ³³Táme bɔpu mí wá lakpátɔ, lé mí tson ikwito, kplí mí yi buntii ání bɔpwe wá wúlu amu ɔma, nesrí sí mu.

Paulo Atowunhe Pú Mu Atɔ Lesúnáhé

12 ¹Ilehíán ání nótsu ɪwɪ, táme tɔ́tɔ́tɔ́ ɪma ɪwɪtsútɔ́. Táme mbli atɔ́a nowun pú tɔ́a anɪ Wíe lalé súná

mí. ²Nfí dúana (14) ní, bɔwan mi ya ɔsúsú saasɔ. (Mí nyankpusa-oyí lɔyɔ unu o, mí ɔkláa o, mméetalí bí. Bulu nkule yín.) ³⁻⁴Fé alá nakúblí á, bɔwan mi ya *Paradiso. (Mí nyankpusa-oyí lɔyɔ unu o, mí ɔkláa o, mméetalí bí. Bulu nkule yín.) Nonu asún ání uma blítɔ, ɔhaa é má ɔkpa blí mú. ⁵Nétalí pú itɔ ámúbú nowun amu tsú iwɪ, táme mmóɔpu mí atɔ bwehé tsú iwɪ. Ntobíá itehá mí ɔwunlín ɔnɔ teba asɪ ntɔpútsú iwɪ. ⁶Ní mbée nótsu iwɪ kúrää á, mmóotsu iwɪ fé ɔha mimláhe, tsúfé néblí ɔnɔkwali. Táme mmóɔbwe. Mmedékléá ɔhaa ɔkú mi dafa alá mí tsiátɔ gyí, ntée asún ámúbú nɔpɔba amu.

⁷Alá mmóɔpu ntobí ánfɪ ibu ifú, ibu wánwan, Bulu lalé súná mí ánfɪ tsú iwɪ su á, ɔɔpu owu ku wá mí awútɔ, igyi Ɖbunsám-ɔbɔpu. Itedá wɔ mí, ménɪ mmóotsu iwɪ. ⁸Nakókóli anɪ Wíe Yesu tse sa kéké mbée, ɔlé itɔ ámu mítɔ. ⁹Táme asún ání ɔtebláa mi brégyíbré gyí, “Mí awɔtɔle pé gyí tɔá fehián. Tsúfé ɔhá ání mu ɔwunlín ɔnɔ laba asɔ mí túmi tehié lun ɔwan.” Íni su ibu mi ansigyí ání nɔpu tɔá itehá mí ɔwunlín ɔnɔ teba asɪ tsú iwɪ, ménɪ Kristo túmi ámu íbéhɪe bun misu. ¹⁰Kristo su ansí bégyi mi brégyíbré. Ní mí ɔwunlín ɔnɔ iba asɪ, bude mí sia, mbu ikplántɔ, budɪn mísú, ntée iwɪ de mí ɔsun, tsúfé ní mí ɔwunlín ɔnɔ iba asɪ á, mú ntelányá ɔwunlín ní.

Korinto Ɖpasua Iwɪ Asún

¹¹Nabwé iwɪ fé ɔha mimláhe, táme mlɪláhá ulaba alɪ. Tekɪ ílehián ání mléblí asun wankláán tsú mí iwɪ. Tsúfé ibu mútɔá mmegyí tɔtɔ, táme ndun “sumbí ayɔpú akpɔnkpɔntɪ” ánfɪ mú. ¹²Bréá mbu mlɪ wá á, notomi bwé tɔá ibu wánwan pú osúna múa ofúla ɔtsan-ɔtsan, púsúná mlɪ ání lélé sumbí ɔyɔpú ngyi. ¹³Ntɔ dé mlɪ háan? Tɔá nɔbwe mlɪtɔ, mmɔbwe ɔpasua bámbátɔ gyí, mmesi iwɪ tswɪ mlɪsu. Kókoli, mlɪsikie mí!

¹⁴Séi á, otse saasɪ ndebweá néba mlɪ wá á. Mméeba besi iwɪ tswɪ mlɪsu, tsúfé mmedé tɔtɔ futé tsú mlɪ wá. Mlɪ onutɔ ndehián. Kebi tamatsú mu sɪ wá akɔnkɔ, mu sɪ tótsú mu wá

akonko. ¹⁵Ubu mi ɔdweá néyintá tógyítá mbu mli su, sí mí wɔ fée kúráá há mli. Ínǎá nde mli dwe dubi alí á, ntogyi su ɔdweá mli mú mli bu há mísú dedinkí?

¹⁶Fíali mlilawun ání lélé, mmɛba besi wɔ tswi mli su, táme mlidéblí mli aa, nofwifwí ansí. Ndepu ató tsun mli omuá wá mli ɔnɔ. ¹⁷Ɔkpa ɔmɔmɔsu? Nɔtsun ahá ámúb nɔwa mli wá ámɔɔ ɔkusu sísi mli lóó? ¹⁸Bréá nokokóli Tito, nɔwa mua aní pío Okristoyin amu mli wá mé, olebesisí mli? Ekekeke! Tsúfé agywun kule mía mɔnyɔ anudépubwé toku kule.

¹⁹Fíali mlidé mú tsu bré ánfɔtɔ fée mli aa, anidétɔí púká wɔ lé. Megyí alí ígyi. Akristofɔ anígyí, anidétɔí Bulu ansítɔ. Mí adwepú, anidé tógyítɔ bwe púwá mli ɔwɔnlín. ²⁰Tsúfé ifú de mí ání néba mlumésíe wankláán. Mú su mí asun blíhé bɔwɔ mli asɔtɔ. Fíali nɔbɔtɔ utrɛ, ɔnsɔpɛ, ɔbló, olu, ahásia, ahá wɔ asúnblí, iwɔtsú pú abasuda mli ɔ. ²¹Nhíé nde ifú nya ání ní ne bá unu á, mí Bulu ɔbétrá ba mi asɔ mli su. Nósu, tsúfé mli ɔ aku mlumókúsí mli lakpan dada amu bwe, dámlí klɔntɔ sí mbuatɔ, hakpanla pú ɔwólí laláhe amu.

Uklá Pú Ɔláda

13 ¹Otse saasi ne bá mli wá á. Bulu asún leblí ɔbéé, “Asa mléha ɔku ipón á, mli nu adansíɔ abanyó ntée abasá ɔnɔ.” ²Bréá neba mli wá otse nyɔɔsi a, neda ahá ámúb bude lakpan bwe ámu fée ɔlá. Ntráa nde amú aha tráhe fée ɔlá da, tsúfé ní ne bá unu á, néhe bíti amú isu. ³Tsúfé mlidékléa mlébi ání lélé Kristo déɔtɔ tsun mli su. Kristo ɔwɔnlín ɔnɔ mɔkúba asɔ mli ɔ. Mu túmi é ihíé tɔɔ mli ɔ. ⁴Ubu mútá mu *oyikpalíhesu lowu ilosuná ání alapɔn, táme séi á, otsie nkpa Bulu túmitɔ. Bréá ania mɔnyɔ anilóbwe kule a, anilópɔn, táme séi ania mɔnyɔ anutsie nkpa Bulu túmitɔ. Mú anidépubká mli ní.

⁵Mli ɔ mli nwuntɔ ki beɛ, ahógyipu onutó mli gyí? Mli kapu mli wɔ ki beɛ, lélé Kristo Yesu bu mli ɔ? Mli lawun ání ɔ bu mli ɔ? Ní mlumókúwun mu mli ɔ mú á, múmú megyí ahógyipu onutó mli gyí. ⁶Nahogyiá mléba bebi ání

Kristo ahogyipu onutó angyí. ⁷Anidé Bulu kokóli aniaa, mlumátrá bwe lalahe koku. Megyí aliá ibósuná ání angyí Kristo ahogyipu onutó sv. Táme ní ahá budekú bee megyí Kristo ahogyipu onutó angyí ó á, ɔhá mli mú amlubwe t́á ida ɔkpa. ⁸Tsúfé aní mú anuméetalí kúsú líí ɔɔkwali asún ámusu, dun ání abéha mú ibóyo nkpá wule. ⁹Ní aní mú aní ɔwunlín ɔɔ́ laba asi, mli klé ulawá ɔnlun á, ansí bégyi aní. T́á anidé Bulu kulí gyí, ɔhá amlilalu kínkíínkín, amludan Kristo hógyito. ¹⁰Íni sù nagyankpá nde ɔwulú ánfu wanlín sísí mli, asa amba unv ní. Méni ní nebá á, mmóobotsu ibi mli. Tsúfé ndekléá nópu túmi ámúú aní Wíe lapóhá mí ámu búa mli amludan. Mmóɔpuyintá mli.

¹¹Apíó, itráhe a, ansí igyí mli. Mliɔ mbódí amlulu kínkíínkín, amludan Kristo hógyito. Mliwa aba ɔwunlín. Mli agywun ibwé kole, amltsia iwilwiito, méni Bulu ámúú ɔɔɔdwé aní, ɔtehá aní iwilwii amu obétsiá mlito bré féé. Nehá mli itsiá gyágyáágyá.

¹²Mliha aba itsiá, amlilata aba puta ɔdwesu.

Bulu ahá ámúú bubu nfi ámu féé behá mli itsiá gyágyáágyá.

¹³Aní Wíe Yesu Kristo bualegyí, Bulu ɔdwe pú Ɔhe Wankíhé kolebwe itsiá mli féésú.